

## PRITCHARD, EVAN ('Ieuan Lley'n'; 1769 - 1832), bardd

**Enw:** Evan Pritchard  
**Ffugenw:** Ieuan Lley'n  
**Dyddiad geni:** 1769  
**Dyddiad marw:** 1832  
**Priod:** Mary Pritchard (née Roberts)  
**Rhiant:** Mary Thomas (née Charles)  
**Rhiant:** Richard Thomas  
**Rhyw:** Gwryw  
**Galwedigaeth:** bardd  
**Maes gweithgaredd:** Eisteddfod; Barddoniaeth  
**Awdur:** Thomas Parry

Digwydd ei enw weithiau fel Evan Richards, a'i enw barddol fel 'Ieuan ap Rhisiart,' 'Ifan Lley'n,' a 'Bardd Bryncroes.' Mab ydoedd i Richard Thomas, saer maen, a Mary Charles, merch [Charles Mark](#), T -mawr, Bryncroes, un o bregethwyr cynnar y Methodistiaid yn Llŷn. Yr oedd ei fam yn brydyddes bur nodedig. Tua 1795 ymfudodd ei rieni i America, a chymerth Ieuan ei gartref gyda'i daid yn Nhŷ -mawr, ac ar ôl ei farw ef, ym Mai 1795, gyda'i ewythr Lewis Charles, yn yr un lle. Yn y cyfnod hwn bu'n athro ysgol yn Llanddeiniolen.

Yn 1800 aeth i Loegr yn swyddog tollau. Dychwelodd i Gymru tua 1812. Yn 1816 priododd Mary Roberts, Hen-d , Bryncroes, a bu iddynt ddau fab a merch. Ar ôl dychwelyd i Llŷn bu'n cadw ysgol ym mhlwyf Bryncroes a'r plwyfi cyfagos hyd ei farwolaeth, 14 Awst 1832.

Cystadleuodd droeon yn eisteddfodau'r cyfnod, e.e. yn Ninbych yn 1792 ar 'Cyflafan y Beirdd,' yn y Bala yn 1793 ar 'Tymhorau'r Flwyddyn ' ac yn Ninbych yn 1828 ar 'Gwledd Belsassar.' Ar 16 Hydref 1799 urddwyd ef a '[Dafydd Ddu Eryri](#)' a '[Gutyn Peris](#)' yn feirdd Cadair Gwynedd gan '[Iolo Morganwg](#)' pan oedd y gŵr hwnnw ar ei daith ym Môn ac Arfon. Yn Ionawr 1800 ymddangosodd y rhifyn cyntaf o gylchgrawn a elwid *Greal neu Eurgrawn*, wedi ei argraffu a'i gyhoeddi yng Nghaernarfon. Ar ei ddechrau ceir cywydd annerch gan '[Dafydd Ddu Eryri](#)' a rhagymadrodd gan 'Ieuan Lley'n,' a diau mai'r ddau hyn oedd y golygyddion, er na ddywedir hynny'n bendant. Nid ymddangosodd ond un rhifyn o'r cylchgrawn, ac y mae'n debyg mai'r rheswm am hynny oedd i Ieuan fynd i Loegr yn fuan wedyn. Cyhoeddwyd [Caniadau Ieuan Lley'n](#) ym Mhwlheli yn 1878 o dan olygiaeth '[Myrddin Fardd](#).' Ysgrifennodd rai emynau sy'n adnabyddus hyd heddiw. (Ar hynny gweler [J. Thickens](#), *Emynau a'u Hawduriaid*, 75.)

### Awdur

Syr Thomas Parry, (1904 - 1985)

### Ffynonellau

W. O. Evans, 'Beirdd a Llenorion Lley'n,' yn *Cyfansoddiadau Buddugol Eisteddfod Gadeiriol Sarn Meillteyrn, Awst 1883* (Sarn 1884), 104-13

J. Jones ('Myrddin Fardd'), *Enwogion Sir Gaernarfon* (1922)

J. Jones ('Myrddin Fardd'), '[Adgof uwch Anghof](#).' *Llythyrau Iluaws o Brif Enwogion Cymru* (1883), 19-20

*Additional Manuscript in the British Museum* 15030 (150)

Thomas Parry, *Trafodion Cymdeithas Hanes Sir Gaernarfon*, XXVI, 52-71

### Dolenni Ychwanegol

VIAF: [21814399](#)

Wikidata: [Q18761948](#)

**Dyddiad cyhoeddi:** 1953

**Hawlfraint Erthygl:** <http://rightsstatements.org/page/InC/1.0/> 

Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

